

USUL MENTERI PERTAHANAN

PEMBENTANGAN KERTAS PUTIH PERTAHANAN DI MESYUARAT KETIGA, PENGGAL KEDUA, PARLIMEN KE-14, DEWAN RAKYAT PADA ISNIN, 2 DISEMBER 2019

Tuan Yang Di-Pertua, dengan sukacitanya saya berdiri di dewan yang mulia ini, untuk mengemukakan satu usul seperti berikut:

Bahawa Dewan ini menyedari akan perlunya dasar pertahanan negara diperbaharui agar strategi dan keupayaan pertahanan negara adalah seiring serta relevan dengan perubahan persekitaran keselamatan global yang semakin mencabar dan tidak menentu.

Bahawa Dewan ini mendukung aspirasi Kerajaan untuk menyemai tadbir urus yang baik melalui prinsip keterbukaan, ketelusan, inklusif dan progresif selain menonjolkan profesionalisme dan akauntabiliti Kerajaan melalui Kertas Putih Pertahanan (KPP).

Bahawa Dewan ini menyokong Kerajaan bagi menetapkan bahawa KPP akan menjadi hala tuju strategik pertahanan negara untuk tempoh 2020 hingga 2030 bagi melindungi kepentingan negara dan mempertahankan kedaulatan serta keutuhan wilayah.

Bahawa Dewan ini meluluskan dan merestui dasar dan usaha yang diperkenalkan dalam KPP yang meliputi Kerangka Pertahanan Nasional sejajar dengan kedudukan negara sebagai sebuah negara maritim yang bersusur galur kebenuaan dan sebagai gerbang penjalin antara kedua-dua rantau Asia Pasifik dengan Lautan Hindi.

Bahawa Dewan ini dalam meluluskan Kertas Putih Pertahanan – Malaysia Yang Selamat, Berdaulat dan Makmur, Dewan ini menyeru agar semua lapisan masyarakat untuk turut bersama-sama memikul tanggungjawab pertahanan sebagai satu usaha sama nasional.

Dengan izin Tuan Yang Di-Pertua, saya bentangkan Kertas Putih Pertahanan – Malaysia Yang Selamat, Berdaulat dan Makmur untuk dibahaskan oleh ahli-ahli Yang Berhormat di dewan yang mulia ini.

[Bab 1: PENGENALAN]

Tuan Yang Di-Pertua,

1. Dasar berkaitan pertahanan telah dibangunkan pada tahun 1971, 1979 dan 1981. Pada tahun 1986, Dasar Pertahanan Negara yang komprehensif telah disediakan dan melalui proses kajian semula pada tahun 1993 dan 2006. Dalam mendokong hasrat Kerajaan untuk menyemai tadbir urus yang baik melalui prinsip keterbukaan, ketelusan, inklusif dan progresif, Kertas Putih Pertahanan atau KPP diterbitkan sebagai wadah baharu dasar pertahanan negara bagi tempoh 2020 hingga 2030. KPP digubal berdasarkan proses libat urus dengan pihak berkepentingan. Dokumen utama yang menjadi rujukan KPP ialah Dasar Keselamatan Negara yang merupakan dasar payung bagi keselamatan.

[Apakah itu KPP?]

2. KPP merupakan satu dokumen mengenai hala tuju strategik dan perancangan pertahanan negara. Berbeza daripada dokumen dasar pertahanan negara yang terperingkat, KPP ialah dokumen terbuka yang boleh diakses oleh rakyat. KPP menggariskan visi untuk mempertahankan Malaysia sebagai sebuah negara yang selamat, berdaulat dan makmur. Visi ini dicapai dengan memposisikan negara sebagai sebuah negara

maritim dengan susur galur kebenuaan dan memaksimumkan potensi negara sebagai gerbang penjalin yang menghubungkan kedua-dua rantau Asia Pasifik dengan Lautan Hindi.

[Mengapakah KPP Diperlukan?]

3. Tujuan KPP dibangunkan adalah bagi melibatkan rakyat dan pihak berkepentingan di dalam isu pertahanan negara. KPP juga menjelaskan persekitaran strategik keselamatan yang sentiasa berubah dan bagaimana keadaan itu mempengaruhi keselamatan Malaysia. Seterusnya, kaedah dan pendekatan untuk mempertingkatkan tahap kesiagaan Angkatan Tentera Malaysia atau ATM akan dikenal pasti bagi tujuan pelaksanaan.

[Bagaimanakah KPP Memenuhi Visi Negara?]

4. KPP memenuhi visi negara melalui tiga keberhasilan iaitu keesahan, penerimaan dan kebolehpercayaan. Keesahan merujuk kepada kuasa kerajaan sebagai elemen utama dalam membina ketahanan dalaman yang membolehkan KPP diformulasi berdasarkan input daripada pelbagai pihak berkepentingan sebagaimana amalan demokrasi. Penerimaan adalah berkait dengan KPP sebagai satu dokumen kerajaan dan dasar yang telah dipersetujui dalam kalangan agensi kerajaan bersesuaian dengan kaedah whole-of-government. Kebolehpercayaan pula merujuk kepada perakuan dan keyakinan bahawa ATM berupaya dan sentiasa siap siaga untuk melindungi kepentingan negara dan mempertahankan kedaulatan dan keutuhan wilayah.

Tuan Yang Di-Pertua,

[Bab 2: PERSPEKTIF STRATEGIK]

[Ketidaktentuan Hubungan Kuasa Besar]

5. Persekitaran luaran yang tidak stabil mewujudkan pelbagai ketidaktentuan yang mampu menggugat kepentingan negara. Ketidaktentuan hubungan kuasa besar merujuk kepada interaksi antara Amerika Syarikat dengan China serta hubungan mereka dengan kuasa-kuasa lain. Hubungan dua hala ini yang diselangi dengan kerjasama dan persaingan memberi implikasi terhadap kestabilan, keselamatan dan kemakmuran serantau yang seterusnya mempengaruhi dasar dan tindakan negara-negara lain.

6. Di sebalik rundingan dan kerjasama antara Amerika Syarikat dengan China yang masih berterusan, hubungan kedua-dua negara telah memasuki fasa baharu yang lebih cenderung kepada saing-menyaing berbanding dengan saling toleransi. Kedua-dua negara terbabit di dalam perang perdagangan yang semakin sengit, diikuti oleh penyahgandingan teknologi, ketegangan maritim dan pergeseran lain.

7. Pendudukan dan pententeraan atau *militarization* serta aktiviti lain oleh China di Laut China Selatan dan *Freedom of Navigation Operations* atau FONOP yang dijalankan oleh Amerika Syarikat serta kuasa-kuasa lain, telah mengubah isu perebutan wilayah kepada persaingan kuasa-kuasa besar dunia. Pencerobohan kapal kerajaan kuasa besar di luar pesisir Sabah dan Sarawak jelas bertentangan dengan hak kedaulatan negara di Zon Ekonomi Eksklusif di Laut China Selatan sebagaimana yang diperuntukkan di bawah undang-undang antarabangsa.

8. Sementara itu, perselisihan Rusia-Barat dan konflik Afghanistan, Syria, Yaman dan beberapa negara lain di rantau Asia Barat dan Afrika menjadi bertambah tegang. Ketegangan hubungan Amerika Syarikat dengan Iran juga semakin memuncak. Peningkatan penjajaran kepentingan-kepentingan Rusia, Iran dan Turki telah mengubah landskap geopolitik Eurasia. Peristiwa-peristiwa geopolitik lain telah membentuk semula jalinan keselamatan dan kesalinghubungan ekonomi yang

merentasi rantau Asia Tengah dan Asia Selatan. Asia Selatan juga masih terus dibelenggu konflik.

9. Selari dengan perkembangan *Belt and Road Initiative (BRI)*, Dialog Keselamatan *Quadrilateral (The Quad)* telah diaktifkan melibatkan Australia, India, Jepun, dan Amerika Syarikat pada tahun 2017. Pada tahun 2018, negara-negara *The Quad* telah mengumumkan strategi "Indo-Pasifik" versi masing-masing yang menerangkan peranan keselamatan negara dan rangka kerjasama perhubungan. Pada bulan Jun 2019 ASEAN telah menerbitkan "*ASEAN Outlook on the Indo-Pacific*".

10. Semua perkembangan ini mempunyai kesan langsung dan tidak langsung kepada Asia Timur, termasuk Asia Tenggara, sekali gus mewujudkan peluang dan cabaran. Dari sudut ekonomi, Asia Timur kekal sebagai rantau yang paling rancak dan terintegrasi. Namun demikian, dari sudut keselamatan, rantau ini mempunyai pelbagai titik nyala (*flashpoint*). Walaupun terdapat usaha-usaha pemulihan hubungan diplomasi di Asia Timur terutama di Semenanjung Korea, keselamatan di rantau ini masih tidak menentu.

[Kejiranan Asia Tenggara yang Kompleks]

11. Sementara kuasa besar mempengaruhi Malaysia dengan kuasanya, kejiranan Asia Tenggara pula mempengaruhi Malaysia dengan jaraknya. Disebabkan geografi, keselamatan dan kepentingan negara terkesan dengan tindakan, dasar dan limpahan pembangunan negara jiran.

12. Selain daripada pertikaian wilayah, kepentingan Malaysia di rantau ini turut dipengaruhi oleh beberapa isu dua hala yang lain seperti tuntutan bertindih, kesan limpahan konflik dalaman negara jiran; dan krisis pelarian yang tercetus akibat isu domestik negara serantau.

[Ancaman Keselamatan Bukan Tradisional]

13. Malaysia juga menghadapi ancaman bukan tradisional merentasi sempadan yang melibatkan pelaku negara dan bukan negara. Ancaman keganasan dan ekstremisme terhadap keselamatan negara semakin meningkat. Magnitud dan bentuk ancaman adalah selari dengan perkembangan semasa di negara jiran dan Asia Barat. Returning fighters telah datang ke Asia Tenggara dan mengambil peluang menjalin hubungan dengan pegganas tempatan dan memanipulasikan media sosial untuk menyebarkan naratif DAESH yang telah turut mempengaruhi lone wolf.

14. Ruang siber adalah domain baharu keselamatan dan geopolitik negara yang berpotensi untuk mengganggu keselamatan negara tanpa perlu menggunakan tindakan kinetik (fizikal). Kemajuan teknologi seperti Internet of Things, Pengkomputeran Awan, Data Raya, Deep Learning, Teknologi 5G dan Kecerdasan Buatan telah mendedahkan operasi ketenteraan kepada ancaman siber.

15. Perlanunan dan rompakan laut di Zon Maritim Malaysia merupakan satu ancaman keselamatan kepada pengguna laluan perairan. Walaupun telah berkurangan, ancaman-ancaman bukan tradisi lain yang saling berkait seperti penculikan, kegiatan perikanan haram, penyeludupan dadah, perdagangan manusia, penyeludupan pendatang dan pelbagai aktiviti-aktiviti haram lain telah mendatangkan cabaran kepada Malaysia.

16. Disebabkan halangan teknologi dan kos yang lebih rendah, kumpulan pegganas mungkin menggunakan makmal bagi menghasilkan Senjata Pemusnah Besar-besaran bagi menyerang kepentingan-kepentingan Malaysia. Negara turut terdedah kepada bahaya alam semula jadi dan alam sekitar. Bencana alam berkaitan dengan iklim dan kejadian cuaca yang melampau semakin meningkat, mengancam keselamatan, kesihatan, dan pembangunan Malaysia.

[Strategi Jangka Panjang Nasional]

17. Berdasarkan penilaian keatas lanskap keselamatan serantau dan global, Malaysia perlu mempertahankan kepentingannya menerusi penerokaan strategi jangka panjang yang proaktif. Strategi ini melibatkan elemen pertahanan sebagai komponen utama dan menyokong perkongsian kemakmuran, perkongsian keselamatan dan perkongsian identiti di peringkat kebangsaan dan serantau.

18. Malaysia akan mewujudkan ekosistem strategik yang seimbang dengan kerjasama lebih luas dan mencipta opsyen dasar yang lebih banyak dengan memainkan peranan sebagai gerbang penjalin di antara rantau Asia Pasifik dan Lautan Hindi. Malaysia akan memaksimumkan kelebihan yang dimiliki sebagai sebuah negara maritim di susur galur kebenuaan yang berada di antara Laut China Selatan dan Lautan Pasifik dengan Selat Melaka dan Lautan Hindi.

[BAB 3: STRATEGI PERTAHANAN]

Tuan Yang Di-Pertua,

19. Dalam menyelaraskan postur pertahanan negara sejajar dengan dasar keselamatan negara dan dasar luar negeri, Kerangka Pertahanan Negara telah dibangunkan. Kerangka ini menerangkan visi, kepentingan dan objektif pertahanan negara. Visi pertahanan negara adalah mengekalkan Malaysia sebagai sebuah negara yang selamat, berdaulat dan makmur.

20. Kepentingan pertahanan negara yang pertama meliputi keselamatan – iaitu mempertahankan kawasan daratan, Zon Maritim Malaysia, laluan strategik laut dan udara serta laluan komunikasi kritikal. Kepentingan pertahanan negara kedua adalah kedaulatan melalui pengekalan kemerdekaan negara dan menyekat campur tangan pihak asing.

21. Manakala kepentingan pertahanan ketiga merujuk kepada kemakmuran iaitu melindungi kepentingan ekonomi negara, kesejahteraan rakyat, peluang pembangunan dan kemajuan termasuk kepentingan di luar negara. Strategi pertahanan negara adalah disandar kepada kedudukan geografi Malaysia mengambil kira kedudukan Semenanjung Malaysia dengan Sabah dan Sarawak yang dipisahkan oleh Laut China Selatan.

[Objektif Pertahanan Negara]

22. Bagi menggapai visi dan melindungi kepentingan negara yang telah diterangkan, lima objektif pertahanan negara telah dikenal pasti. Objektif ini adalah terangkum dan meliputi kesemua aspek pertahanan dan pengurusan sumber iaitu:

- a. Pembangunan pelbagai domain bagi mengesan, mencegah dan menafikan sebarang bentuk ancaman;
- b. Peningkatan daya ketahanan dalaman dengan melaksanakan pendekatan keseluruhan kerajaan dan keseluruhan masyarakat;
- c. Pengukuhan kapasiti pertahanan melalui perkongsian berwibawa dengan rakan antarabangsa;
- d. Pemajuan industri pertahanan sebagai pemangkin ekonomi; dan
- e. Penginstitusian tadbir urus terbaik dan menjayakan reformasi organisasi

[Kawasan Lapisan Berpadu]

23. Bagi menjamin keselamatan Malaysia, terdapat tiga kawasan lapisan berpadu yang perlu dipertahankan pada setiap masa iaitu:

- a. Kawasan Teras iaitu kawasan daratan di Semenanjung Malaysia serta Sabah dan Sarawak, persisiran perairan serta ruang udara di atasnya;
- b. Kawasan Lanjutan iaitu kawasan hak berdaulat yang merangkumi Zon Maritim Malaysia, laluan perairan strategik, ruang udara di atasnya dan laluan hubungan komunikasi kritikal; dan
- c. Kawasan Hadapan iaitu lokasi melangkaui kawasan lanjutan di mana kepentingan negara boleh digugat.

[Tonggak Strategi Pertahanan]

24. Tiga tonggak strategi bagi mempertahankan kawasan kepentingan berpadu telah dikenalpasti iaitu Cegah Rintang Berpadu, Pertahanan Komprehensif dan Perkongsian Berwibawa. Tiga tonggak ini saling berkait dan menyokong antara satu sama lain. Cegah Rintang Berpadu melibatkan peranan ATM melindungi kepentingan negara daripada ancaman keselamatan tradisional dan bukan tradisional. Pertahanan Komprehensif pula menekankan kepentingan seluruh kerajaan dan masyarakat dilibatkan dalam usaha mempertahankan negara selaras dengan konsep Pertahanan Menyeluruh (HANRUH). Menerusi Perkongsian Berwibawa, Malaysia akan meningkatkan kerjasama pertahanan secara dua hala atau pelbagai hala dengan negara-negara lain.

[BAB 4: ANGKATAN MASA HADAPAN]

Tuan Yang Di-Pertua,

[Peranan ATM]

25. Sebagai perisai negara, atau Nation's Shield, KPP menggariskan dua peranan ATM iaitu: peranan utama dalam melindungi kepentingan negara, mempertahankan kedaulatan

dan keutuhan wilayah daripada semua ancaman menerusi pelaksanaan operasi maritim, udara, darat dan siber elektromagnetik; dan peranan sekunder iaitu melaksanakan operasi-operasi ketenteraan selain peperangan atau *Military Operations Other Than War, MOOTW*, membantu pihak berkuasa awam dalam penguatkuasaan serta sokongan usaha keamanan sejagat melalui panji PBB.

[Struktur Angkatan]

26. Struktur dan penampilan angkatan perlu dibentuk semula untuk menangani persekitaran keselamatan yang sentiasa berubah. Walaupun kekuatan ATM dikekalkan pada saiz semasa untuk tempoh KPP ini, namun penjurusan semula dan pengutamaan akan dilaksanakan untuk memenuhi keperluan masa hadapan. Penekanan yang khusus akan diberikan untuk meningkatkan keupayaan bersama serta merealisasikan keperluan melaksanakan operasi dua wilayah merangkumi Semenanjung Malaysia, Sabah dan Sarawak.

27. Bahagian penting dalam pembangunan Angkatan Masa Hadapan ialah pelaburan jangka panjang Kerajaan dalam meningkatkan kesiapsiagaan ATM dengan penyediaan aset dan kelengkapan yang diperlukan, keupayaan tenaga kerja yang berasaskan pengetahuan dan kemahiran ke arah askar pintar.

28. Kerajaan beriltizam untuk membangunkan ATM agar menjadi angkatan yang Bersepadu, Tangkas dan Berfokus yang mempunyai lima ciri utama iaitu kebersamaan, kebolehoperasian, berasaskan teknologi, keupayaan untuk beroperasi serentak dalam dua wilayah dan berorientasikan misi. Ciri-ciri ini akan membentuk angkatan yang berupaya diaturgerak dengan pantas, melaksanakan pelbagai peranan dan mampu beroperasi di empat domain utama, iaitu maritim, udara, darat, dan siber elektromagnetik.

[Keperluan Keupayaan]

29. KPP juga telah mengenalpasti 10 keperluan keupayaan iaitu:

- a. Memperkukuhkan perisikan pertahanan ATM;
- b. Membangunkan Keupayaan Aktiviti Elektromagnetik Siber;
- c. Meningkatkan Keupayaan Perisikan, Pengawasan, Perolehan Sasaran dan Peninjauan atau ISTAR;
- d. Membangunkan *Network Centric Operation*;
- e. Komunikasi Satelit untuk meningkatkan kemampuan Perintah dan Kawalan Bersama;
- f. Mengekal dan meningkatkan kemampuan dan tempo operasi Pasukan Khas ATM;
- g. Domain Maritim - Meningkatkan Keupayaan Tempur Maritim, dan Keupayaan Daya Tahan Operasi Maritim;
- h. Domain Udara - Keupayaan Pertahanan Udara dan Serangan Udara;
- i. Domain Darat - Meningkatkan kuasa tembakan, mobiliti, komunikasi, keupayaan logistik; dan
- j. Membangunkan kemampuan amfibi.

[Postur Angkatan]

30. Sejalan dengan panduan daripada Kerangka Dasar Luar Malaysia Yang Baharu, KPP menzahirkan penekanan untuk menolak penggunaan tindakan kekerasan dalam menyelesaikan

sebarang pertikaian atau konflik. Sebaliknya, Malaysia mengambil pendekatan penyelesaian secara aman dalam menangani semua bentuk pertikaian. Kerajaan menzahirkan iltizam ini dengan mengguna pakai postur defensif, iaitu Cegah Rintang Berpadu.

[BAB 5: WARGA PERTAHANAN]

Tuan Yang Di-Pertua,

[Angkatan Tetap]

31. Keselamatan negara adalah demi rakyat, untuk itu ianya memerlukan penglibatan semua lapisan masyarakat, selaras dengan penekanan terhadap perkongsian tanggungjawab pertahanan. Peranan rakyat dan warga kerja pertahanan dalam mempertahankan negara seterusnya diilustrasi melalui Pertahanan Komprehensif, iaitu tonggak kedua dalam Strategi Pertahanan Negara.

32. Bagi memenuhi tuntutan masa hadapan, pemerkasaan pengurusan sumber manusia adalah penting untuk meningkatkan kesiapsiagaan dan keberkesanan ATM secara berterusan. Kesiagaan operasi dan pencapaian misi hanya boleh dicapai sekiranya anggota ATM direkrut, dibentuk dan dikekalkan kemahiran bagi meningkatkan kemampuan keseluruhan negara dalam mendepani segala cabaran mendatang. Dalam menghargai profesionalisme, pengalaman dan usaha pengekalan anggota ATM, Kerajaan juga akan memastikan elaun, insentif dan kemudahan lain seperti kesihatan dan perumahan sentiasa di kaji semula.

[Angkatan Sukarela & Simpanan Angkatan Tetap]

33. Melalui Angkatan Sukarela dan Simpanan Angkatan Tetap, KPP turut menzahirkan aspirasi untuk membentuk angkatan yang anjal sebagai menguat dan menambah besar Angkatan Tetap. Peranan kedua-dua Simpanan Angkatan Tetap dan Angkatan

Sukarela wajar untuk diperluas agar dapat diatur gerak bersama Angkatan Tetap semasa konflik serta membantu pihak berkuasa awam semasa kecemasan dan bencana.

34. Seiring dengan dinamik cabaran keselamatan, bidang kepakaran baharu bagi Angkatan Sukarela turut diperluas meliputi antaranya kejuruteraan satelit, keselamatan siber dan pengkomputeran awan. Selain menjadi platform bagi memupuk semangat patriotisme, Angkatan Sukarela juga merupakan penghubung penting antara rakyat dengan tentera dalam merapatkan jurang nilai antara kedua-duanya. Kehadiran Angkatan Sukarela dalam masyarakat dapat menyemaikan nilai-nilai murni ATM dalam jiwa rakyat sekali gus menggalakkan hubungan awam-tentera yang lebih erat.

[Veteran]

35. Kerajaan mengiktiraf khidmat bakti Veteran ATM dalam mempertaruhkan nyawa untuk menjaga keselamatan negara. Sehubungan dengan itu, Kerajaan akan terus menjaga kebajikan veteran sebagai tanda penghargaan atas pengorbanan ikhlas mereka. Fokus utama Kerajaan adalah untuk meningkatkan taraf sosioekonomi veteran melalui peningkatan kebolehpasaran sebagai peluang kerjaya kedua dan keperluan sosial lain seperti penjagaan kesihatan, bantuan berkaitan seperti sara hidup, persekolahan dan lain-lain.

[Rakyat]

36. Pertahanan Komprehensif bertujuan untuk menyokong pelaksanaan konsep HANRUH yang meliputi Kesiagaan Keselamatan, Perpaduan dan Penyatuan Sosial, Kesiapsiagaan Awam, Keutuhan Ekonomi dan Keutuhan Psikologi. Konsep ini menekankan bahawa tanggungjawab mempertahankan negara bukan hanya digalas oleh ATM dan pasukan keselamatan bahkan juga seluruh lapisan masyarakat dari peringkat organisasi hingga individu.

37. Kesiagaan keselamatan merujuk kepada tindakan dan persediaan untuk melindungi negara, rakyat dan sumber nasional daripada ancaman luar. Sehubungan itu, ATM juga turut menyumbang kepada pembangunan negara bangsa.

38. Menggembleng sumber dan usaha antara pihak berkuasa awam, sektor swasta dan pertubuhan sukarela adalah penting dalam memastikan keperluan infrastruktur yang mencukupi dan efektif meliputi pengangkutan, logistik, komunikasi dan bekalan kecemasan, sokongan perkhidmatan dan kepakaran; sokongan aktif kepada Angkatan Sukarela serta penganjuran kempen kesedaran. Kerajaan bertekad untuk menyemai budaya keselamatan dalam kalangan rakyat kerana jatuh bangun sesebuah negara bergantung penuh pada kesatuan, ketahanan dan keampuhan rakyat dalam mendepani segala ancaman masa kini dan mendatang.

[BAB 6: HUBUNGAN PERTAHANAN ANTARABANGSA]

Tuan Yang Di-Pertua,

39. Kerajaan memacu Perkongsian Berwibawa menerusi kerjasama pertahanan dua hala atau pelbagai hala dengan negara-negara lain melalui mesyuarat berkala, wacana strategik, pelaksanaan latihan, eksekusi, operasi ketenteraan dan pertukaran pegawai. Matlamat hubungan pertahanan antarabangsa antara lain adalah untuk memperkukuh kestabilan serantau selari dengan undang-undang antarabangsa, konvensi, peraturan dan norma; meningkatkan keupayaan ATM dan kesiapsiagaan pertahanan; serta mengetengahkan pendirian dan kepentingan Malaysia di arena antarabangsa.

40. Kerajaan akan terus memberikan keutamaan kepada ASEAN dan mekanisme yang diterajui oleh ASEAN sebagai satu platform penting untuk bersama-sama memastikan pencapaian keamanan, keselamatan dan kestabilan serantau. Malaysia mengesahkan komitmen untuk meningkatkan penglibatan di

peringkat global dalam menyumbang terhadap keamanan sejagat serta terus memainkan peranan penting dalam menerajui kerjasama pertahanan subrantau dan menonjolkan kepimpinan Malaysia dalam isu keselamatan dan pertahanan serantau selari dengan konsep Rahmatan lil 'alamin dan Maqasid Syariah.

[BAB 7: SAINS, TEKNOLOGI & INDUSTRI PERTAHANAN]

Tuan Yang Di-Pertua,

41. KPP memperkenalkan satu pendekatan baharu terhadap dasar sains, teknologi dan industri pertahanan negara dengan menjadikannya pemangkin ekosistem pertahanan dan pertumbuhan ekonomi negara.

42. Dasar Industri Pertahanan Negara yang akan digubal susulan penerbitan KPP, bakal menjadi garis panduan untuk pembangunan sektor ini. Dasar Industri Pertahanan Negara akan mengandungi lima teras utama iaitu Pembangunan Modal Insan, Pembangunan Teknologi, Pembangunan Industri, Ke Arah Keupayaan Berdikari dan Tembusi Pasaran Global.

43. Seterusnya lima inisiatif telah direncana dalam merealisasikan teras berkenaan meliputi:

- a. Pemantapan kerangka strategi ekonomi untuk sains, teknologi dan industri pertahanan memfokuskan kepada bidang khusus;
- b. Penstrukturan semula organisasi berkaitan industri pertahanan;
- c. Penubuhan Jawatankuasa Pelaburan Pertahanan;
- d. Perangsangan R&D dan inovasi melalui pembiayaan mampan; dan

e. Pengukuhan program pembangunan.

44. Kerajaan sentiasa menyokong dan memberi komitmen yang tinggi kepada pembangunan sains, teknologi dan industri pertahanan tempatan dalam usaha mencapai tahap keupayaan berdikari yang lebih tinggi dan menjadi pemangkin kepada ekonomi negara.

[BAB 8: REFORMASI, TADBIR URUS DAN PEMBIAYAAN]

Tuan Yang Di-Pertua,

45. Dalam melaksanakan KPP, tiga blok binaan telah dikenalpasti:

- a. Pertama, mencapai reformasi pertahanan bertujuan untuk mengstruktur dan mengukuhkan institusi hubungan kerja yang produktif antara sektor awam dan ATM;
- b. Kedua, menginstitusikan tadbir urus terbaik untuk memastikan reformasi pertahanan dilaksanakan secara berperingkat dengan telus dan kebertanggungjawaban; dan
- c. Ketiga, ketetapan peruntukan kewangan pertahanan yang stabil dan mampan bagi memastikan ATM dilengkapi aset dan kelengkapan yang berupaya menangani cabaran masa kini dan akan datang.

46. Reformasi pertahanan akan dilaksanakan menerusi satu pelan induk iaitu Pelan Pelaburan Pertahanan Negara (3PN) yang mengandungi hala tuju dan perancangan perkara berkaitan pelan pembangunan keupayaan bersama ATM, Rangka Tindakan Kapasiti Pertahanan dan penggubalan Dasar Industri Pertahanan Negara.

[Mekanisme Pemantauan]

47. Mekanisme pemantauan yang dianggotai oleh pelbagai agensi akan diwujudkan bagi melihat pelaksanaan KPP meliputi Jawatankuasa Pelaburan Pertahanan di peringkat kebangsaan, dan Jawatankuasa Dasar dan Jawatankuasa Reformasi Pertahanan di peringkat Kementerian. Kerajaan turut mengiktiraf peranan aktif oleh Jawatankuasa Pemilihan Khas Pertahanan dan Hal Ehwal Dalam Negeri yang dibentuk oleh Dewan Rakyat sebagai langkah proaktif ke arah mencapai tahap tadbir urus terbaik dalam perbelanjaan dan perolehan negara.

48. Untuk memaksimumkan keesahan, penerimaan dan kebolehpercayaan KPP, kesemua perancangan akan didokumenkan untuk pelaksanaan dan pemantauan. KPP membuktikan peri pentingnya komitmen Kerajaan Malaysia demi mengekalkan Malaysia sebagai negara yang selamat, berdaulat dan makmur.

Tuan Yang Di-Pertua,

Saya mohon mencadangkan.